

ՀԱՆՐԱԿՐԹԱԿԱՆ ՀԻՄՆԱԿԱՆ ԾՐԱԳՐԵՐ ԻՐԱԿԱՆԱՑՆՈՂ
ՈՒՍՈՒՄՆԱԿԱՆ ՀԱՍՏԱՏՈՒԹՅԱՆ ՀԵՐԹԱԿԱՆ
ԱՏԵՍՏԱՎՈՐՄԱՆ ԵՆԹԱԿԱ ՈՒՍՈՒՑՉԻ
ՎԵՐԱՊԱՏՐԱՍՏՈՒՄ

ՀԵՏԱԶՈՏԱԿԱՆ ԱՇԽԱՏԱՆՔ

Դասն առաջին դասարանում՝ խաղից մինչև ուսումնական
գործունեություն

Հեղինակ – Հրանուշ Թորոսյան

Երևան 2023

Բովանդակություն

1. Ներածություն

2. Գլուխ 1. Գրաձանաչության գործընթացի կազմակերպման փուլերը և դրանց ընթացքում իրականացվող խաղերը

3. Գլուխ 2. Զննականության դերը գրաձանաչության ընթացքում և դրա օգտագործման մանկավարժահոգեբանական սկզբունքները

4. Գլուխ 3. Գրաձանաչության ընթացքում դիդակտիկ խաղերի օգտագործման իմ փորձից

5. Եզրակացություններ

6. Օգտագործված գրականություն

Ներածություն

ՀՀ «Կրթակարգի»¹ համաձայն 2007-2008 ուսումնական տարվանից դպրոց են հաճախում 5.5-6 տարեկան երեխաները: Այս տարիքը համընկնում է նախկին նախադպրոցական տարիքի հետ: Հոգեբանները գտնում են, որ նախադպրոցական տարիքում գործունեության առաջատար տեսակը խաղն է: Խաղն առաջատար է դառնում ոչ այն պատճառով, որ ժամանակակից երեխան, որպես կանոն, իր ժամանակի մեծ մասն անց է կացնում խաղալով: Խաղը երեխայի հոգեկանում որակական փոփոխություններ է առաջացնում, երեխայի մեր սաղմնավորվում են ուսումնական գործունեության հիմքերը, որոնք առաջատար են դառնում դպրոցական տարիներին:

Դասվարները հաճախ են ասում, որ իրենք ժամանակ չունենք խաղալու համար:

Իսկ, երբ ասվում է, որ պետք է խաղալ, նրանք խաղում են վաղուց արդեն անհետաքրքիր դարձած և որևէ դիդակտիկ նշանակություն չունեցող խաղեր («Թզուկներ և հսկաներ», «Գիշեր-ցերեկ», «Անտառում սունկ ենք հավաքում» և այլն): Անշուշտ, այսպիսի խաղեր ևս անհրաժեշտ է կազմակերպել, որովհետև դրանք աշխուժացնում են աշակերտներին, սակայն միայն դրանք և այն էլ՝ բացմիցս կազմակերպելը ուսումնական գործընթացը ոչ միայն հետաքրքիր չեն դարձնում, այլև պարզունակացնում են այն, դարձնում անարդյունավետ: Հենց այս դեպքում է, որ դիդակտիկ խաղերը պետք է օգտագործել ուսման նկատմամբ հետաքրքրություն առաջացնելու համար:

Դիդակտիկ խաղերի միջոցով կարելի է ստուգել հին նյութը, հաղորդել նոր նյութը, ամրապնդել ձեռք բերված գիտելիքները և կարողությունները:

Ուսումնասիրությունները ցույց են տվել, որ դիդակտիկ խաղերը նպաստում են երեխաների ուշադրության և հիշողության զարգացմանը: Դիդակտիկ խաղերի

¹ ՀՀ «Կրթակարգ», «Անտարես», Երևան, 2004:

Ժամանակ երեխաներն ավելի շատ գիտելիքներ են մտապահում, ավելի վաղ ու հեշտությամբ է դրսևորվում նրանց ուշադրությունը կենտրոնացնելու, մտապահելու և մտաբերելու գիտակցական նպատակը: մեր մանկավարժական գործության ընթացքում համոզվել ենք, որ դիդակտիկ խաղերը շատ մեծ ազդեցություն են գործում ինչպես խոսքի, այնպես էլ մտքի զարգացման գործընթացում:

Վ. Ա. Սուխոմլինսկին գտնում էր, որ «խաղը կայծ է, որ վառում է պրպտողության և հետաքրքրասիրության կրակը»:

Մենք մեր մանկավարժական գործունեության ընթացքում նկատել ենք, որ տարրական դասարաններում քիչ տեղ է հատկացվում դիդակտիկ խաղերին, որը նպաստում է երեխաների արագ հոգնածությանը, ուսումնական գործընթացի նկատմամբ հետաքրքրության նվազմանը: Մենք փորձում ենք դիդակտիկ խաղերի միջոցով հաղթահարել 5,5-6 տարեկան երեխաների ուսումնական գործընթացի դժվարությունները:

Այսպիսով, **հետազոտական աշխատանքի նպատակն** է ներկայացնել առաջին դասարանում մեր իրականացրած դիդակտիկ խաղերի գիտամեթոդական վերլուծությունը:

Դասն առաջին դասարանում՝ խաղից մինչև ուսումնական գործունեություն

Գլուխ 1. Գրաճանաչության գործընթացի կազմակերպման փուլերը և դրանց ընթացքում իրականացվող խաղերը

Հայտնի է, որ գրաճանաչության կազմակերպման գործընթացի բովանդակությանն ու ընտրված մեթոդներին ներկայացվում են սովորողների տարիքային առանձնահատկություններով պայմանավորված որոշակի պահանջներ: Դրանք հիմնականում պայմանավորված են հոգեկան այն գործընթացներով, որոնք ուսումնական արդյունավետության խնդրում ակնառու դեր ունեն: Հոգեկան այդ գործընթացների՝ հիշողության, ուշադրության, մտածողության, երևակայության, կամքի և խոսքի զարգացման մակարդակով է պայմանավորված մարդու՝ տարաբնույթ գործունեության արդյունավետությունը: Բնականաբար՝ գրաճանաչության կազմակերպման գործընթացում հարկավոր է հաշվի առնել 5,5-6 տարեկան առաջին դասարանցիների հոգեկան գործընթացների առանձնահատկությունները՝ առաջին հերթին կարևորելով ոչ թե գիտելիքների հաղորդումը, այլ նշված գործընթացների զարգացման ուղղությամբ մեթոդապես ճիշտ, հոգեբանամանկավարժական տեսանկյունով հիմնավորված աշխատանքների իրականացումը:

Մեթոդիստներն ու մանկավարժները գտնում են, ու գրաճանաչության ուսուցումը կազմակերպելիս պետք է հաշվի առնել նաև ուսուցման՝ մատչելիության, զննականության, հաջորդայնության, պարզից դեպի բարդը, ծանոթից անծանոթը գնալու և անհատականության սկզբունքները՝ դասի ժամանակ կարևոր դեր տալով ինչպես դիդակտիկական, այնպես էլ շարժուն խաղերին:

Ջ. Գյուլամիրյանը գտնում է, որ գրաճանաչության գործընթացում պետք է պահպանել մանկավարժահոգեբանական մի քանի հիմնական պահանջներ.

1. «Դասի որոշակի փուլում ուսուցիչը պետք է երեխաներին բացատրի, թե իրենք ինչ պետք է անեն այդ պահին, իսկ աշխատանքի ավարտից հետո պետք է ամփոփի՝ ինչ արեցին, ինչ սովորեցին:
2. Աշակերտներին տրվող հարցերը, առաջադրանքները պետք է ձևակերպվեն հակիրճ, հստակ, հասկանալի բառերով:
3. Պետք է գերակշռեն համադասարային, փոքր խմբերով և զույգերով աշխատանքը, որոնց ժամանակ ուսուցչուհին պետք է ցույց տա իր տված առաջադրանքի կատարման նմուշները, բացատրի կատարման ընթացքը:
4. Կարդալու ուսուցման դասի ժամանակ երեխաները պետք է շատ կարդան, իսկ գրավորի դասին՝ շատ գրեն (անպայման կատարելով ֆիզկուլտդարներ):
5. Դասի ընթացքում պետք է մի քանի անգամ փոխել երեխաների գործունեության տեսակները (կարդալ-նկարել-գրել-երգել-խոսել-խաղալ և այլն):
6. Դիդակտիկ նյութերը, գննական պարագաները, ուսուցման տեխնիկական միջոցները, փոխգործուն մեթոդները, խաղային առաջադրանքները պետք է օգտագործվեն տեղին և այն չափով, որքանով, որ կնպաստեն ուսուցման մատչելիության ու հետաքրքրաշարժությանը՝ առանց աշակերտներին ծանրաբեռնելու և նրանց ուշադրությունը դասի հիմնական նպատակից շեղելու:
7. Դասը պլանավորելիս պետք է նկատի ունենալ ինչպես ամբողջ դասարանի, այնպես էլ յուրաքանչյուր աշակերտի պատրաստակամությունը՝ կարևորելով ուսումնական նյութի յուրացումը յուրաքանչյուր սովորողի կողմից:
8. Աշխատել բացառել դիտողություններն ու պատիժները, նախընտրությունը տալ խրախուսանքներին:
9. Ուսուցումը կազմակերպելիս ուսուցիչը չպիտի նկատի ունենա, որ աշխատանքի արդյունավետությունը պայմանավորված է իր լեզվաբանական գիտելիքներով ու մանկավարժահոգեբանական հմտություններով և ձգտի մշտապես զբաղվել դրանց ձեռքբերմամբ ու կատարելագործմամբ:

10. Գրաճանաչության գործընթացում ուսուցանվող նյութի նկատմամբ երեխայի դրսևորած հետաքրքրությունը ծնվում է այդ նյութը հասկանալու մակարդակից. որքան լավ է երեխան հասկանում նյութը, այնքան նրան այն հետաքրքրում է: Որքան հետաքրքրում է, այնքան երեխան շատ է ուզում իմանալ»:²

Այսինքն՝ ուսումնական գործունեությունը, որն սկսած առաջին դասարանից դառնում է առաջատար, միայն այն ժամանակ կարող է նպաստել փոքրիկ դպրոցականի անձի զարգացմանը, երբ առողջ են և ավարտուն փուլում են գտնվում նրա հոգեկան գործընթացները, և երեխան կարողանում է յուրացնել որոշակի նորմեր, կատարել մտավոր որոշակի գործողություններ:

Գրաճանաչության շրջանում մենք օգտագործում ենք հետևյալ դիդակտիկ խաղերը:³

Խաղ N1. «Այն ո՞վ է կանչում»:

Խաղի նպատակները. Զարգացնել երեխաների ուշադրությունը, ուշիմությունը, ունկնդրելու կարողությունը, ծանոթացնել տարբեր բանաձևերին:

Ընթացքը. աշակերտներից մեկը հրավիրվում է գրատախտակի մոտ: Նա կանգնում է՝ մեջքով դեպի դասարանը: Ուսուցչուհին հերթով մոտենում է երեխաներին և շնչում, թե ինչ միջատի, թռչունի, կենդանու ձայն պետք է հանի տվյալ երեխան: Երեխաները ձայն են տալիս՝ կու՛-կու՛, բը՛զզ..., կվա՛-կվա՛, կը՛ռ... և այլն: Գրատախտակի առջև կանգնած երեխան ոչ միայն պետք է ասի, թե բնության մեջ, որ կենդանին է այդ ձայնը հանում, այլև՝ որ երեխան է «կանչողը»:

Մխավող երեխան պետք է կա՛մ երգի, կա՛մ արտասանի, կա՛մ հանելուկ ասի, կա՛մ...

² Գյուլամիրյան Ջ. Հ., Հայոց լեզվի տարրական ուսուցման մեթոդիկա, Երևան, «Զանգակ-97», 2006, էջ 42:

³ Գյուլամիրյան Ջ. Հ., «Զանգակ այբբենարանի» և «Ես սովորում եմ գրել» աշխատանքային տետրի մեթոդական ուղեցույց, Երևան, «Զանգակ-97», 2003, էջ 40:

Խաղ N2. «Բառաշղթա»:

Խաղի նպատակները. Չարգացնել երեխաների հնչյունային լսողությունը, բառը վերլուծելու կարողությունը, հարստացնել բառապաշարը:

Անհրաժեշտ պարագաներ. տարբեր առարկաների փոքրածավալ նկարներ:

Ընթացքը. դասարանը բաժանվում է խմբերի: Յուրաքանչյուր խմբի առջև լցված են առարկայական նկարներ: Ընտրել և իրար կողքի դասավորել նկարներն այնպես, որ մի նկարում պատկերված առարկայի անվան վերջին տառով սկսվի հաջորդ նկարում պատկերված առարկայի անունը:

Խաղ N4. «Գտի՛ր սխալը»:

Խաղի նպատակները. սովորեցնել երեխաներին տարբերել հնչյունները, զարգացնել բառերը հնչյունային վերլուծության ենթարկելու կարողությունը, ձևավորել բառը վանկահնչյունային գծապատկերի միջոցով ճանաչելու ունակություն, զարգացնել երեխաների ուշիմությունը:

Անհրաժեշտ պարագաներ. առարկայական նկարներ, որոնց ետևում մատիտով տրված են նկարներում պատկերված առարկաների անվանումների գծապատկերները:

Առաջադրանք. դիտել նկարները, որոշել համապատասխան գծապատկերները, գտնել գծապատկերների սխալները և ուղղել:

Խաղ N5. «Ամբողջացրո՛ւ բառը»:

Խաղի նպատակները. սովորեցնել բառերը ճիշտ վանկերի բաժանել, զարգացնել բառապաշարը, դաստիարակել ուշիմություն, մտքի սրություն:

Խաղի ընթացքը. ուսուցչուհին վանկերով ասում է երեխաներին ծանոթ բառերի առաջին վանկը կամ վանկերը, երեխաները պետք է ամբողջացնեն բառը: Օրինակ՝ օ-դա-..., խըն-..., ձրկ-...:

Խաղ N6.

Գրատախտակին գրված են դուռ, լուր, կրունկ բառերը:

Խաղի ընթացքը. Ինչպես կարելի է դուռը դարձնել աշխատանքային գործիք, լուռ բառը՝ տեղեկություն, իսկ կրունկ բառը՝ թոշուն (դուր, լուր, կռունկ):

Խաղ N7.

Գրատախտակին գրված են տուն, շուն, ձուկ բառերը:

Խաղի ընթացքը. Ինչպես կարելի է մեծ տունը փոքրացնել, մայր շունը ձագ դարձնել, հսկա ձուկը՝ փոքր ձուկ (տնակ, շնիկ, ձկնիկ): Յուրաքանչյուր աշակերտ իր տառադարանի տառերով կազմում է գուշակած բառը և կարդում:

Խաղ N8. «Գտի՛ր հարցի պատասխանը»:

Խաղի ընթացքը. Ուսուցչուհին բացատրում է, որ իր տված հարցին պետք է պատասխանել մեկ բառով և պատասխանը ոչ թե բարձրաձայն ասել, այլ լուռ գրել տառադարանի տառերով: Ուսուցչուհին տալիս է տվյալ օրվա դասանյութի բովանդակության վերաբերյալ հարցեր, այնպես, որ երեխաները հիշեն իրենց կարդացածը և պատասխանեն գրավոր: Օրինակ՝

Ուսուցչուհի- Ի՞նչ է սիրում ուտել ոգնին: Աշակերտները պետք է գրեն խաղող բառը:

Խաղ N9. «Հանելուկի գուշակում»:

Ուսուցիչը կարդում է որևէ հանելուկ և աշակերտներին հանձնարարում է.

-Գուշակե՛ք հանելուկի պատասխանը, այն գրե՛ք տառադարանի տառերով:

Հաղթում է, նա ով առաջինը և ճիշտ կկազմի պատասխան բառը: Հարկավոր է թողնել, որ բոլոր աշակերտները կազմեն հանելուկի պատասխան բառը, նոր երեխաներին կարդալ հարցնել:

Խաղ N10. «Ո՞ր առարկան չկա»:

Մեղանին դասավորված են միավանկ, երկվանկ, եռավանկ անուններ ունեցող առարկաներ:

Խաղի ընթացքը. Աշակերտներից մեկը հրավիրվում է սեղանի մոտ, նրան առաջարկվում է ուշադիր դիտել սեղանի վրա դրված առարկաները: Միաժամանակ նրան հայտնում են, որ իր՝ դասարանից դուրս գալուց հետո սեղանի վրայից պետք է վերցնեն առարկաներից մեկը: Ինքը պետք է գտնի՝ որ առարկան է թաքնված, և քանի վանկից է կազմված այդ առարկայի անունը: Երեխան դուրս է գնում: Պահվում է առարկաներից մեկը: Դրսում գտնվող երեխան ուսուցրի հրամանով ներս պետք է գա, ուշադիր դիտի սեղանին դրված առարկաները և որոշի՝ որ առարկան չկա, ասի նրա անունը և որոշի վանկերի քանակը: Եթե ճիշտ է որոշում, պարգևատրվում է ծափահարություններով, իսկ եթե սխալվում է դասարանի որոշմամբ պետք է կա՛մ արտասամի, կա՛մ երգի, կա՛մ հանելուկ ասի և այլն:

Խաղ N11. «Խմբային աշխատանք»:

1-4 հաշվով դասարանը բաժանվում է 4 խմբի: Յուրաքանչյուր խումբ ստանում է առարկաների նկարներ:

Առաջադրանք. տրված նկարներից առանձնացնել և դասավորել միավանկ (առաջին խումբ), երկվանկ (երկրորդ խումբ), եռավանկ (երրորդ խումբ), քառավանկ (չորրորդ խումբ) անվանումներ ունեցող առարկաների նկարները: Այնուհետև խմբի անդամները հերթով բարձրացնում են նկարները և վանկերի բաժանելով՝ արտասանում են նկարում պատկերված առարկաների անունները:

Խաղ N12.

Դասարանը բաժանվում է խմբերի: Յուրաքանչյուր խմբի սեղանին դրված է երկու ծրար: Մեկի մեջ լցված են առարկաների նկարներ, մյուսի մեջ՝ պատկերված առարկաների անունների գծապատկերները:

Առաջադրանք. գտնել և իրար կողքի դնել առարկաների նկարներն ու համապատասխան գծապատկերները: Աշխատանքն ավարտելուց հետո յուրաքանչյուր խումբ ներկայացնում է իր արդյունքը:

Անցկացված խաղերը ևս մեկ անգամ մեզ համոզեցին, որ դրանց ժամանակ երեխաները դառնում են անկաշկանդ և եթե սխալ են թույլ տալիս, ապա հաջորդ անգամ ուշադիր են լինում, որ սխալ չկատաչեն: Նրանց ամենասիրելի խաղերից մեկը «Այն ո՞վ է կանչում» խաղն է: Նրանք շատ հետաքրքիր ու ճիշտ կարողանում են կատարել տարբեր թռչունների, կենդանիների ձայներ և գուշակել:

«Ամբողջացրու բառը» խաղի ժամանակ իմ տված վանկերից նրանք կարողանում են նույնիսկ մի քանի բառ ստեղծել (օդաչու, օդանավ, օդապարիկ):

Ամեն օր անհամբեր սպասում են նոր նյութի հաղորդմանը, թե երբ պետք է կարդանք նոր հանելուկը, որ իրենք գուշակեն: Երեխաները հատկապես մեծ սիրով են խաղում «Ո՞ր առարկան չկա» խաղը: Խաղի ժամանակ ամբողջ դասարանը շունչները պահած սպասում է, թե երբ պետք է ընկերը գտնի պահած առարկան, և երբ սխալվում է, դասարանն անհամբեր սպասում է, թե ընկերն այդ օրը ինչ պետք է արտասանի, երգի, իրենք էլ նրա հետ երգում են, արտասանում:

Մեծ հետաքրքրությամբ ու սիրով աշակերտները կատարում են տարբեր խմբային աշխատանքներ:

Գլուխ 2

Զննականության դերը գրաձանաչության ընթացքում և դրա օգտագործման մանկավարժահոգեբանական սկզբունքները

5-6 տարեկան երեխաները էապես տարբերվում են 7 տարեկան երեխաներից և՛ իրենց մտավոր զարգացման մակարդակով, և՛ լեզվական կարողություններով, և՛ աշխարհըմբռնմամբ, և՛ ֆիզիկական ու ֆիզիոլոգիական հնարավորություններով, և՛ մտավոր հնարավորություններով: Ահա թե ինչու անհրաժեշտ է երեխաների հանդեպ համապատասխան մոտեցման, վերաբերմունքի, նյութի բացատրման ու ամրապնդման, ամփոփման ու մտահանգման նոր ձևեր ու եղանակներ մշակել:⁴

Հոգեբանների, մանկավարժների ուսումնասիրությունները ցույց են տվել, որ 5-6 տարեկան երեխաների գործունեության կտրուկ անցումը ուսումնական գործունեության նրանց մեջ առաջ է բերում մինչ այդ ձևավորված հոգեկան գործընթացների արմատական փոփոխություն: Հենց այդ պատճառով էլ երեխայի զարգացմանն ու կրթությանը կարող ենք անուղղելի վնաս հասցնենք, եթե նրան չափազանց վաղ և ոչ ճիշտ ձևով մտցնենք այդ նոր աշխարհը:

<<Դառնալով աշակերտ, թող երեխան շարունակի այսօր անել այն, ինչ անում էր երեկ, թող նրա կյանքում նորը երևան գա աստիճանաբար և տպավորությունների հեղեղով ապշեցնի նրան>>,-ասում է Սուխոմլինսկին:⁵

Իսկ ինչ էր անում 5 տարեկան փոքրիկը երեկ. խաղում էր ու երգում, պարում էր ու արտասանում, նվագում էր ու ծեփակերտում: Ուրեմն՝ հենց այստեղից էլ հարկվոր է սկսել նրանց ուսուցումը: Վ. Ա. Սուխոմլինսկու 6 տարեկանների դպրոցը կապույտ երկնքի տակ էր, կանաչ խոտերի մեջ, ճյուղառատ տանձենիների տակ, խաղողի այգիներում, կանաչ

⁴ Քյուրքյան Ա. Ն., Տեր-Գրիգորյան Լ. Ա., <<Շողիկ>> այբբենարան, ուսուցչի ձեռնարկ, Երևան, Էդիտ Պրինտ, 2007, էջ 3:

⁵ Սուխոմլինսկի Վ. Ա., Սիրտս նվիրում եմ երեխաներին, Երևան, <<Լույս>>, 1977, էջ 121:

մարգագետիններում: Մեծ մանկավարժն իր աշակերտների առաջին օրերն կազմակերպում էր այնպես, որ չլինի, թե հանկարծ որևէ մեկը հիասթափվի դպրոցից, վախենա ուսուցչից և հեռու փախչի ուսումնական գործընթացից: Չլինի թե հանկարծ ժամանակից շուտ ու սխալ ձևով երեխաներին թափանցել տալ նրանց համար ոչ տեսանելի, ոչ շոշափելի վերացականի աշխարհը:

Երեխաների ուսուցումն այս տարիքում նպատակահարմար է իրականացնել խաղի ճանապարհով: <<Ավելի շատ խաղ, ուրախություն ու զվարճանք պետք է լինի, և համեմատաբար քիչ՝ լուրջ աշխատանք, ավելի քիչ պարտադրանք, շատ՝ վարժեցում>>.-ասել է Աշոտ Տեր-Գրիգորյանը:⁶

<<Այս իմաստով 5,5-6 տարեկաններով համալրված առաջին դասարանների դասի կահավորման հիմնական բաղադրիչը դառնում է խաղալիքը, որը հանդես է գալիս, որպես գննական պարագա: Շրջապատի նման կահավորումը երեխային հիշեցնում է մանկապարտեզը>>:⁷

Խոսելով կրտսեր դպրոցականի մասին Կրուտեցկին գրում է.

....<<Ակնառուն, ցայտունը, իրականը ավելի լավ, ավելի հստակ, ավելի հուզիչ է ընկալվում քան, օրինակ, սիմվոլիկ և սխեմատիկ պատկերները>>:⁸

Խոսելով բնական նյութերով կահավորված դասերի արդյունավետության մասին՝ հարկավոր է հատկապես նշել այն դասերի լիարժեքությունը, որոնք անց են կացվում հենց բնության գրկում, այսինքն՝ որպես դասի կահավորում օգտագործվում է բնությունն իր ամբողջության մեջ: <<Ես ձգտում էի այն բանին, որ մինչև գիրք բացելը, առաջին բառը վանկ առ վանկ կարդալը, երեխաները կարդային աշխարհում ամենահրաշալի գիրքը՝ բնության գիրքը>>,- ասում է Սուխոմլինսկին:⁹

⁶ Տեր-Գրիգորյան Ա. Ե. , Վեց տարեկան երեխաները դպրոցում, Երևան, <<Լույս>>, 1986, էջ 11:

⁷ Գյուլամիրյան Ջ. Հ. , Դասի կազմակերպման առանձնահատկությունները 6 տարեկաններով համալրված առաջին դասարաններում, <<Լույս>>, 1983, էջ 21:

⁸ Կրուտեցկի Վ. Ա. , Մանկավարժական հոգեբանության հիմունքներ, Երևան, <<Լույս>>, 1976, էջ 89:

⁹ Սուխոմլինսկի Վ. Ա. , Սիրտս նվիրում եմ երեխաներին, Երևան, <<Լույս>>, 1997, էջ 121:

5-6 տարեկաններին շատ է դուր գալիս, երբ որպես դասի կահավորման յուրահատուկ ձև օգտագործում են իրենց իսկ ձեռքով պատրաստած դիդակտիկ նյութերը: առաջին դասարանում, երբ անցնում էինք <<Փողոցում>> դասանյութը,¹⁰ երեխաները ծանոթանում էին երթևեկության կանոններին, իրենց ձեռքով պատրաստել էին սովորաթղթից լուսակիրներ և դրանց միջոցով ծանոթացան լուսակրի երեք գույների հետ: Սովորեցին լուսակրի մասին բանաստեղծություն:

Առաջին դասարանում շաբաթական մեկ ժամ արտադասարանական ընթերցանության դաս է: Դասերից մեկի ժամանակ տիկնիկների միջոցով բեմականացվեց Հ. Թումանյանի <<Անբան Հուռին>> հեքիաթը: Երեխաները մեծ ուշադրությամբ հետևեցին հեքիաթի ընթացքին, որից հետո կատարեցին եզրահանգումներ, առանց դժվարության պատմեցին հեքիաթի բովանդակությունը:



<<Գորկին նշում է, որ խաղը 5.5-6 տարեկանների համար իսկական ճանապարհ է դեպի աշխարհի իմացությունը, որի մեջ ապրում են նրանք և որը կոչված են բարեփոխելու>>:

Խաղի միջոցով ընդլայնվում են 5.5-6 տարեկանների պատկերացումները շրջապատի, բնության ու կյանքի մասին: Ա. Տեր-Գրիգորյանը իր <<Վեց

¹⁰ Քյուրքչյան Ա. Ն., Տեր-Գրիգորյան Լ. Ա., <<Շողիկ>> այբբենարան, ուսուցչի ձեռնարկ, Երևան, Էդիտ Պրինտ, 2007, էջ 32:

տարեկան երեխաները դպրոցում>> մեթոդական նամակում ուսուցումը կազմակերպելու երկու ձև է առաջարկում՝ ուսուցում-խաղ և խաղ-ուսուցում՝ տարբեր պայմանների համար առաջին պլան մղելով համապատասխանաբար ուսուցումը կամ խաղը: Այսպես՝ << ...Շաբաթվա առաջին օրերին և օրվա առաջին ժամերին, երբ աշակերտները դեռևս թարմ են, կամային ուշադրությունը բարձր է հարմար է իրականացնել առաջին սխեման, իսկ շաբաթվա վերջին օրերին, երբ երեխաները համեմատաբար հոգնած են լինում, և կամային ուշադրությունը թույլ է, կարելի է դիմել երկրորդ սխեմային՝ խաղ-ուսուցմանը, որը հեշտացնում է ուսուցանվելիք նյութի մոտեցումը:¹¹

¹¹ Տեր-Գրիգորյան Ա. Ե., Վեց տարեկան երեխաները դպրոցում, Երևան, <<Լույս>>, 1986:

Գլուխ 3

Գրաճանաչության ընթացքում դիդակտիկ խաղերի օգտագործման իմ փորձից

Խաղ 1 <<Օճառաման>>

Դասարանի յուրաքանչյուր երեխա ունի օճառաման: Դրանց մեջ նախօրոք լցնում ենք իրենց անցած տառերով կազմած բառեր:

Առաջադրանք: Գտե՛ք օրինակ սուր բառը: Երեխաները, որպեսզի գտնեն սուր բառը, փնտրում են այն օճառամանում՝ այդ ընթացքում կարդալով նաև մնացած բառերը:

Այսպիսով, առաջարկված մեկ բառը գտնելու համար երեխաները 10-15 բառերի մեջ այն փնտրելիս մեխանիկորեն կադում են նաև մյուս՝ 10-15 բառերը: Այս խաղի ժամանակ երեխաները չեն էլ զգում, թե ինչպես կարդացին 15 բառ: Եվ, ամենակարևորը, այդ բառերը երեխաները կարդում են շուրջով կամ մտքում, որի ժամանակ սովորում են նաև շուրջով կարդալ: Խաղի ժամանակ նաև ստեղծվում է մրցութային մթնոլորտ, որն աշխուժացնում է երեխաներին և ակտիվացնում ուսումնական գործունեությունը:

Խաղ 2 <<Կտրասոված տառանմուշներ>>

Երեխաներին բաժանում ենք սովարաթղթից պատրաստված մեծ տառանմուշներ և հանձնարարում նկարչական ալբոմում դրանց օգնությամբ շրջագծել տառը, ներկել այն գունավոր մատիտներով, անվանել տառը: Կարելի է դասարանը բաժանել խմբերի, երեխաների առջև լցնել տարբեր տառեր: Հանձնարարել տառերի մեջ գտնել և ցույց տալ նորածանոթ մեծատառն ու փոքրատառը: Այս խաղի ժամանակ երեխաները ծանոթանում են նորածանոթ մասնիկներին, նոր տառը համեմատում են անցած տառերի հետ, գտնում նմանություններն ու տարբերությունները: Խաղի ժամանակ օգտագործվում են գունավոր մատիտներ, երեխաները ոչ միայն ներկում են տառամասնիկները, այլև միմյանց հետ մտքեր են փոխանակում:

Խաղ 3 <<Կտրատված տառամասնիկներ>>

Երեխաները բաժանվում են խմբերի: Յուրաքանչյուր խումբ ստանում է տարբեր տառերի կտրատված մասնիկները: Երեխաներից յուրաքանչյուրին պետք է բաժին ընկնի մեկ մասնիկ: Նա պետք է որոնի տվյալ տառի մյուս մասնիկը: Հաղթում է այն խումբը, որն առաջինն է ամբողջացնում տառը:

Այս խաղի ժամանակ երեխաները ոչ միայն ծանոթանում են նորածանոթ տառերին, այլև կրկնում են անցած տառերը՝ մտերմանալով միմյանց հետ, սովորելով համագործակցել և այլն:

Խաղ 4 <<Նկար-բառեր>>

Սովարաթղթի վրա պատկերված է որևէ ծաղիկ, կենդանու, առարկայի նկար, իսկ ներքևում գծված է դրա վանկահնչունային գծապատկերը: Երեխաները պետք է ասեն, թե ինչ բառ է գծապատկերում: Իսկ նկարը օգնում է նրանց գուշակել բառը:

Խաղ 5 <<Նկար-նախադասություններ>>

Սովարաթղթի վրա նկարված է գործողություն կատարող մարդ կամ առարկա, իսկ ներքևում գծված է նախադասության գծապատկերը: Երեխաները նայելով նկարին՝ պետք է ասեն, թե ինչ նախադասություն է տեղավորվում գծապատկերում:

Այս խաղը զարգացնում է երեխաների խոսքը, երևակայությունը, դիտողականությունը:

Խաղ 6 <<Ազդանշանային շրջանակներ>>

Երեխաները սովարաթղթից պատրաստում են կարմիր և կապույտ բոնակներով շրջանակներ: Դրանք օգտագործում ենք ձայնավոր և բաղաձայն հնչյունների տարբերակման կարողության ձևավորման ժամանակ: Երբ ուսուցչուհին արտասանում է ձայնավոր հնչյունը, նրանք բարձրացնում են կարմիր շրջանակը, իսկ երբ բաղաձայն հնչյունը՝ կապույտ շրջանակը:

Այս խաղը երեխաներին սովորեցնում է աշխատել ազդանշաններով (սինվոլիկ զննականություն), հասկանալ, մտապահել հրահանգները և դեկավարել սեփական աշխատանքը:

Խաղ 7 <<Տառային բացիկներ>>

Անհրաժեշտ պարագաներ: 1/3 չափով ծավված թուղթ, տվյալ տառով սկսվող առարկայի նկար, տառամասնիկներ:

Առաջադրանք: Երեխաներին տալիս ենք անհրաժեշտ պարագաները: Նրանք պետք է ծավված սովարաթղթի վրա կպցնեն առարկայի նկարը, իսկ բացիկի ներսում գծված տողի վրա կպցնեն տառամասնիկները:

Եզրակացություններ

Մեր ուսումնասիրության արդյունքում հանգել ենք հետևյալ եզրակացությունների.

1. 5,5-6 տարեկաններով համալրված առաջին դասարանում գրաճանաչության ընթացքում անհրաժեշտ է ողջ աշխատանքն իրականացնել՝ օգտագործելով ինչպես դիդակտիկ, այնպես էլ շարժուն խաղեր:

2. Դիդակտիկ խաղերն օգտագործելիս պետք է նկատի ունենալ նրանց իրականացման համակարգայնությունը ու երեխաների տարիքային առանձնահատկությունները:

3. Դիդակտիկ նյութը չարաշահել չի կարելի: Կարելի է որոշել **ե՞րբ և ինչպե՞ս** պետք է օգտագործել դրանք:

4. Պետք է նկատի ունենալ, որ դիդակտիկ խաղերը նպաստում են նաև աշակերտների միջանձնային հարաբերությունների կարգավորման և անձնային կարևոր որակների ձևավորմանը և ըստ այդ նպատակների էլ կազմակերպել այդ խաղերը:

5. Դիդակտիկ նյութերը և խաղերը կարելի է օգտագործել ինչպես նոր նյութի հաղորդման, այնպես էլ անցածի ամրակայման և յուրացումը ստուգելու նպատակով:

6. Դիդակտիկ նյութերը պետք է պատրաստվեն մեթոդապես ճիշտ, ճաշակով և երեխաներին մատչելի ու հասանելի:

Օգտագործված գրականության ցանկ

1. ՀՀ «Կրթակարգ», «Անտարես», Երևան, 2004:
2. Գյուլամիրյան Ջ. Հ., Հայոց լեզվի տարրական ուսուցման մեթոդիկա, Երևան, «Զանգակ-97», 2006:
3. Գյուլամիրյան Ջ. Հ., «Զանգակ այբբենարանի» և «Ես սովորում եմ գրել» աշխատանքային տետրի մեթոդական ուղեցույց, Երևան, «Զանգակ-97», 2003:
4. Գյուլամիրյան Ջ. Հ., Դասի կազմակերպման առանձնահատկությունները 6 տարեկաններով համալրված առաջին դասարաններում, <<Լույս>>, 1983:
5. Կրուտեցկի Վ. Ա., Մանկավարժական հոգեբանության հիմունքներ, Երևան, <<Լույս>>, 1976:
6. Սուխոմլինսկի Վ. Ա., Սիրտս նվիրում եմ երեխաներին, Երևան, <<Լույս>>, 1997:
7. Տեր-Գրիգորյան Ա. Ե., Վեց տարեկան երեխաները դպրոցում, Երևան, <<Լույս>>, 1986:
8. Քյուրքչյան Ա. Ն., Տեր-Գրիգորյան Լ. Ա., <<Շողիկ>> այբբենարան, ուսուցչի ձեռնարկ, Երևան, Էդիտ Պրինտ, 2007: